

## ԳԼՈՒԽ Բ.

### «ԱՆՁԵՒ ՔԱՕՍԻ» ՄԻՋԻՑ

Արտակարգ դժար պարտականութիւն էր դնում պատմութիւնը Հայաստանի գործիչների վրա: Իսկապէս որ, «անձե քաօսի և աւերակների կոյտ էր» Հայաստանը այդ օրերին: Եւ սարսափելին այն էր, որ չկար ոչ մի հեռանկար: Թիւրքերը ծեծում էին արդէն Բագուի դռները: Գերմանացիք՝ յաղթական արեւմուտքում: Ռուսաստանում քաղաքացիական կռիւն էր ծաւալում իր բոլոր արհաւիրքներով: Դրսից պաշտպանութիւն, ապրուստի միջոց, դրամական օժանդակութիւն չկար: Ինչ որ արելու էր՝ պէտք էր անել սեփական ուժերով:

Հայաստանը, աւելի շուտ, դաղթականական կայան էր. ամբողջ երկրում շուրջ 450,000 դաղթական էր թափւած, որից մօտ 40,000ը՝ Երևանում, շատերը՝ փողոցների և աւերակ շէնքերի մէջ: Հաց չէր ճարւում, ժողովուրդն ապրում էր ինչով որ պատահէր: Գեանախնձորով կամ լոբիով խառն հացի ֆունտը քաղաքում, սկզբի օրերին, արժէր 5 բուբլի և այն էլ ճարւում էր դժարութեամբ:

Սարսափելի էր որբերի վիճակը: Երևանի «Ձանգ» թերթը գրում էր օգոստ. 3-ին. «Տասնեակ հազարաւոր որբեր այսօր ցրւած Հայաստանի Հանրապետութեան սահմաններում, մոռացւած ամենքից՝ ենթակայ են ցրտի, քաղցի և համաճարակ հիւանդութիւնների... Մահացողներին վերջ չկայ. մեռնում են ամենքը և ամենուրեք, դիւղերում թէ՛ քաղաքներում, բացօդեայ ամենքի աչքի առաջ»:

Հացի, բնակարանների, հագուստի և դեղերի պակասն ու դաղթականութեան խոնւածութիւնը առաջ բերին ու զարգացրին համաճարակ հիւանդութիւններ, սկզբում քոլերան, ապա բժաւոր տիֆը, որի դերանդին առատ հունձ էր անում ամէն կողմ: Տուն չկար, որ հիւանդ չունենար: Հիւանդները թափւած էին և՛ փողոցներում ու հրապարակներում: Միայն յունիս ամսի 12-18-ին Երևանի զինւորական հիւանդանոցը ընդունել էին 370 հիւանդներ, որից մեռել էր 142 հոգին, առողջացել 25: Օգոստ. 28-29-ին հիւանդանոցում կային 197 հիւանդներ, մեռան 17 հոգի: Զինւորական հիւանդանոցից դուրս, մասնաւոր բժիշկների տեղեկութիւններով օգոստ. 12-29-ին, Երևանում, մեռել էր 56 մարդ և հիւանդացել 157: Այս դեռ սկիզբն էր երկանց: Հասցնելով պատրաստւած հիւանդանոցներն անգոր էին իրական դարման հասցնելու. դեղ չկար, վառելիք չկար, սնունդ չկար, սպիտակեղէն չկար: Եւ մարդիկ մեռնում էին անմոռնչ, հարիւրներով, հազարներով: Ժողովուրդը սպառւում էր վառւող մոմի պէս: